

溫江縣志卷八

人物上第八



傳曰十室之邑必有忠信十步之間必有芳草自有歷
史以來偉儒魁彥雖不時生而端良之士何地無之惟
淪蕪塵莽名湮沒而不彰者不知凡幾斯為可慨耳溫
邑自建設以來有唐一代人物丰蹟流述於今者竟無
一人豈果無其人哉蓋記載之闕也無亦文學之士樂
道人善而颺人美者眇耶竊嘗謂吾邑人物事功無赫
赫照耀歷史者然隱玉薶光必不乏人執筆者當銳意
蒐求如覓寶於深山大澤然第獲之近代而遠卒無徵
固見聞之陋亦無可如何也茲編所列以分寸楮墨之
光豈足以昭垂鴻寓然使後生讀之見鄉先輩多善人
君子未必不樂噓吸前芬感發於無窮此則區區之志
也

溫江縣志

卷八

人物

一

卅〇二

鄉賢

晉 常騫 族弟寬

常騫字季慎治毛詩三禮以清尚知名察孝廉任萍鄉
令選為成都王侍郎出宰綿竹復入為郎中令從王起

名目宜列次
行以下同此
者均誤

義有功封關內侯遷魏郡太守以晉政衰覩中原不靖
因辭去官拜新都內史時蜀亂民皆流在荆湘徙湘東
太守未拜病卒騫性汎愛敦友宗族當官修理恕以撫
物好咨問動必謙讓州鄉以爲儀範族弟寬尤以德行
著稱

寬字太恭父廓明經術早亡寬閉門廣學治毛詩三禮
春秋尙書尤耽意大易博涉史漢強識多聞而謙虛清
素與俗殊務郡命功曹及察孝廉皆不就州辟主簿別
駕舉秀才爲侍御史除繁令旋因避亂南入交州刺史

溫江縣志

卷八

人物

二

陶咸表爲長史固辭不之職雖流離交城衣敝緼袍冠
皮冠乘牛往來獨鳩合經籍研精著述著典言五篇撰
蜀後志及後賢傳續陳壽耆舊作梁益篇元帝踐祚嘉
其德行潔白拜武平太守民悅其政以榮貴非志在官
三年去職尋梁碩作亂得免難卒於交州凡所著述詩
賦論議二十餘篇

曾學傳曰常道將自稱常氏爲江原東方大姓余攷
漢晉江原東方乃溫江西南境則常氏之賢固吾桑
梓之彥也因冠之於篇示景慕焉若季慎之前有常

勛常忌名行皆高而不錄者爲其初仕蜀漢後歸魏晉故也士大夫出處名節所關可不慎哉

宋 尹瞻 張孝祥

尹瞻以博通知名自隋設進士科能文之士率由進士起家唐邑進士失考至宋吾鄉得進士者推瞻爲首天聖五年丁卯王堯臣榜瞻與新繁梅摯眉州蘇渙雙流郭輔與焉皆一時名士也出爲永州通判時天下未徧興學永州地近南荒苗獠雜處瞻爲起橫舍廣教育拔其士之秀者獎異之南人爲之開化後濂溪又子皆出

溫江縣志

卷八

人物

三

其間而理學萌芽矣瞻生平守正不欺一日城中火且風勢熾不可撲滅肅具朝服向火拜風止火熄其至誠若此宋自瞻後邑人得進士爲名臣惟張孝祥自文營以下二十餘人多不詳其事實論者惜焉

張孝祥字安國直祕閣祁子祁見志操傳孝祥讀書過目不忘下筆頃刻數千言年十六領鄉書再舉冠里選紹興二十四年廷試第一時策問師友淵源秦墳冠多士孝祥次之曹冠又次之高宗讀墳策皆秦檜語於是擢孝祥第一而墳第三授承事郎簽書鎮東軍節度判

官論宰相曰張孝祥詞翰俱美秦檜不悅後遂風言者
誣祁有反謀下獄檜死得免投孝祥祕書省正字召對
言乞上總攬權綱以盡更化之美又言官吏忤故相意
並緣文致有司觀望鍛煉而成罪乞令有司改正又言
王安石作日錄一時政事美則歸己故相信任之專非
特安石臣懼其作時政記亦如安石專用己意乞取已
修日歷詳審是正黜私說以垂無窮從之累遷起居舍
人權中書舍人初孝祥登第出湯思退之門思退爲相
擢孝祥甚峻而思退素不喜汪澈孝祥與澈同爲館職

溫江縣志

卷八

人物

四

川上二七

澈老成持重而孝祥年少氣銳往往陵拂之至是澈爲
御史中丞首劾孝祥姦不在盧杞下孝祥遂罷官提舉
江州太平興國宮於是湯思退之客稍稍被逐尋除知
撫州年未三十蒞事精確老於州縣者所不及孝宗卽
位復集英殿修撰知平江府事煩劇孝祥剖決無畱滯
屬邑大姓並海囊橐爲姦利孝祥捕治籍其家得穀粟
數萬石明年吳中大饑迄賴以濟張浚自蜀還朝薦孝
祥召赴行在孝祥旣素爲湯思退所知及受浚薦思退
不悅孝祥入對乃陳二相當同心勦力以副陛下恢復

之志且靖康以來惟和戰兩言遺無窮禍要先立自治之策以應之復言用才之路太狹乞博采度外之士以備緩急之用上嘉之除直學士院兼都督府參贊軍事後知潭州爲政簡易時以威濟之湖南遂以無事徙知荆南湖北路安撫使作守金隄自是荊州無水患置萬盈倉以儲諸漕之運請祠以疾卒孝宗惜之有用才未盡之歎進顯謨閣直學士致仕年三十八孝祥天姿邁偉議論風采文章政事卓著一時天下士莫不以當世功名屬之在長沙闢敬簡堂款當代名儒與綿竹張南

軒交最善其卒也南軒爲文哭之曰嗟乎如君而止斯耶其英邁豪特之氣其復可得耶其如長江巨河奔逸洶湧渺然無際而獨不見其匯溟渤之時耶又如驂騮綠耳追風絕塵一日千里而獨不見其日暮稅駕之所耶此某所以痛之深惜之至而哭之悲也惟君起布衣被簡遇十年之間入司帝命出領數路文章之煒煌政事之超卓多士之所共知不待某之贊歎惟其孝友恂恂朝夕則人有不得而盡知者方自荊州歸某以書抵君謂及此閒暇專意承志實進德修業之要君深以爲

然孰謂曾未數月乃有此聞某傾蓋荷知久而采篤言
有勁切君不以爲迂此意何可忘也道阻且長不得往
哭遣致一奠孰知予悲

曾學傳曰宋史載孝祥歷陽烏江人不詳其原籍吾
人猶據嘉定劉甲蜀人物志祀之鄉賢祠豈豔其爲
狀元歟斯則陋矣抑於前賢有愛慕而無忌嫉爲其
名行足爲里邑光也讀南軒致祭文其風翮高騫益
可見矣

明 任漢

溫江縣志

卷八

人物

六

三三

任漢字少卿父承欽永樂辛卯舉人官光祿寺署正漢
天性孝友容止矜莊成化丁未登進士歷官御史抗疏
論列權貴悉皆斂避林俊稱眞御史按察浙江寬嚴並
施吏畏其威而民懷其德擢江西布政使時境內羣盜
鴟張漢至悉望風瓦解稽顙投誠寧藩宸濠陰蓄反謀
朝廷畏之欲藉大臣剛方素著有威望者監制鎮攝之
晉漢右副都御使巡撫江西兼總制鄖陽經畧三省遠
近帖然聲績丕著先是江南副使胡世寧疏言寧府威
勢日張不逞之徒羣聚而導以非法上下諸司承奉太

過數假火災奪民廩地采辦擾旁郡蹂藉徧窮鄉臣恐
良民不安皆起爲盜臣下畏禍多懷二心禮樂刑政漸
不自朝廷出矣請於都御史俞諫任漢中專委一人或
別遣公忠大臣鎮撫勅王只治其國毋擾有司以靖亂
源銷意外變至是朝廷果以漢鎮撫其間惜任未久遽
召爲南京大理寺卿漢去而宸濠之變不可復遏矣漢
掌大理寺多所平反案無冤滯天下想望風采當宁方
資倚毗乃屢乞終養以歸錦衣承歡時人歆豔宅傍新
開江合小溪流處漢築釣臺其上後人名其江曰釣魚
西著有奏議十卷禮庵詩集六卷

溫江縣志

卷八

人物

七

川上川

江左右有歧竹蔚然深秀漢優游其間以終卒葬釣臺
世宗御祭文維嘉靖四年乙酉春二月庚寅朔十七
日丙午皇帝遣四川布政使司參議李寅諭祭於南
京大理寺卿任漢曰惟爾資性通明才識精敏發身
科第職列行人執法憲臺振揚風紀歷任方伯克効
勤勞晉陟中丞巡撫著績載遷理寺多所平反委任
方殷屢陳終養孝誠甫遂哀訃遽聞追念往勞良用
悼惜遣官諭祭庸示卹恩九原有知尙其歆假仍旌

其墳前曰嘉靖四年勅賜玉葬清風丕著格秉至公
吏部尙書喬宇祭文功惟道樹德以仁顯敦實不華
而名斯遠公以膚美蚤登顯任驄馬繡衣權貴歛避
輪埋風生車行雨至司臬浙江威惠竝施感恩有亭
去思有記長憲嶺海風紀斯彰桓桓方伯載轉豫章
潢池弄兵梟獍張望公之來角崩其降厥功旣茂
乃晉中丞帝曰汝賢撫治是膺投艱任重以莫不勝
大理垂光廷尉是寄早暮平反罔有冤滯疏廣見機
張翰思葺陳情終養愛日何誠梁壞蜀山星隕湔濱

溫江縣志

卷八

人物

八

溘焉而逝歿此哲人訃聞當宁常用盡恫有俎有葬
以示優崇宇等義當執紼勢遠莫從緘辭萬里不盡
餘衷

少保李克嗣祭文死生聚散雖道之常念公之逝朝
野盡傷公有夙德國器圭璋敷歷中外雅舉鏗鏘皇
華銜命諮諏四方裘豸風裁白簡飛霜攬轡外臺何
用不臧尙德緩刑濁激清揚不茹不吐百鍊之鋼入
掌廷尉三載建康維明克允頌聲洋洋囹圄無冤于
公頡頏獻功奏最公望日彰朝紳仰止棟宇巖廊便

道歸侍戲彩稱觴承歡戀戀三上休章榮膺俞命閑
極可償方期錫嘏永壽無疆哀訃上聞卹典焚黃遣
官祭葬荷恩無量賁於窀穸九原之光充嗣等斯文
寅契道誼班行絮辭遙致以酬幽岡

何漢宗

梁萬鍾

孫祖齡

祝宏舒

何漢宗景泰辛未進士歷官廣西按察副使生平尙氣
節不隨時俗俯仰居官清介長甯學士周洪謨稱爲鐵
石心腸

梁萬鍾字天賜成化己丑進士知仁和興利舉廢崇教

溫江縣志

卷八

人物

九

川三

厚俗歷知同州時關中饑萬鍾發倉賑貸又勸富民輸
粟煮粥多所濟活擢兩浙鹽運使未幾乞休萬鍾居官
才具機敏勤於民事後坐逆璫劉瑾倚撫代償逋負三
千兩盡鬻田產輸官恬不介意年九十無疾而終孫祖
齡承祖訓能世其德

祖齡萬曆壬午舉人丙戌登進士第官至河南都察院
僉都御史居官清正所在卓著賢聲致仕歸表正鄉閭
嘉惠桑梓邑人敬之與任漢並稱兩都堂前明邑進士
多賢者蓋由諸先達學行風聲所漸爲不失其正云

祝宏舒號禮野正德辛未進士任江南含山令崇學校
毀淫祠清戶口平賦役賑歉恤孤以才能調浙之太平
俗不舉女下令嚴禁全活甚多擢知雲南楚雄府因俗
爲治尤篤意文教易五顯祠爲龍岡書院卜遷學宮以
當形勝策勵諸生人文崛起武定鳳朝文之亂區畫城
守遠近避亂者歸之賊不敢入其境升江淮鹽運使乞
休歸著有禮野漫興

清 向日昇 王和中 李時春

向日昇字方陽不詳其原籍康熙辛未隨父起鳳入蜀

溫江縣志

卷八 人物

十

補成都諸生丙子登賢書旋卜居邑太平鄉遂爲邑人
自撰水竹居記胸懷高遠愴然與風月爲鄰後官陝西
韓城知縣清介不阿詳除陋規勒石以蘇民困歲旱祈
雨不應日昇爲文祭城隍曰秦中兵荒已歷年所死亡
不可勝計幸天心仁愛漸獲西成民之老者安少者養
瓊尾流離者方得復業而安居乃自入夏兩月不雨赤
土久枯嘉禾未種日昇守斯土日夜焦勞冀竭一己之
微誠以仰神麻以祈甘雨卒不可得數日以來陰雲初
合狂飈輒起若更有神物焉以靳之豈天心之終不愛

斯民耶無亦守土者賦重科煩刑嚴罰峻吏縱民勞獲罪於天以至此耶夫不能爲民請命不能息訟不能寧人皆守令罪也譴之責之固其宜也韓民何罪之有尙冀神始終降康無忍終絕我民令聞橫山有靈謹齋沐以告祭訖甘霖旋沛歲獲有秋有巨卿子挾賄逼易訛案日昇徑白其母致謝失教乃已韓城進士貴州巡撫劉應樞高其風骨謂能去桑梓百年積弊後解組歸士民餞送泣下

偶記憶先府君以康熙辛未入蜀於時生計未甚促

也比僑寓溫江越歲金盡裘敝馬瘠僕痛矣居停主方挈其田廬而轉售焉顧誰爲依劉計者府君屬孺人至會城謀諸外氏貸十金以畱卒不可得予侍孺人歸時已薄暮夕陽在山宿鳥投林野霧荒烟沉冥欲晦遙望府君挾小奴跌坐道傍以俟急詢狀則皇然若失矣屈指流陰二十餘年丁酉秋予卜居新廟道經此地觸景生悲慨先人之落寞思創造之艱難因與左氏謀售茲產然自此往來隴畔不能無動於中也唐人詩云昔記山川是今傷人代非此在朋友

且然况吾父母哉書之以誌吾痛

曾學傳曰此可以觀方陽先生之純孝

王和中字華外父昂字駒若文學有傳和中少補諸生隨父任值大府取道新淦使治候館執卷坐家人關白一切領之而已供張未備一人入與之談古論今彼此互相駁辨既而悟爲大府微服入境遽拜謝罪大府扶之書扇以贈謂僚屬曰考據精確可敬也三十後卽不應試居家教授終日衣冠危坐讀書常至夜分手鈔周易數過性至孝年逾六十母或不悅則長跪膝前必色

溫江縣志

卷八

人物

十三

川又上

霽乃起其天性純篤如此

李時春邑儒生少劬學室內不設牀蓐臥隱几事親至孝居父喪哀毀骨立及母卒水漿不入口者數日飭粥三年後值父母忌日及己生辰無不悲感生平所居恭敬盛暑必衣冠課徒先授以孝經小學爲講明義利之辨貧可造者且資助所入館穀除自奉外悉以與親族之貧者晚年猶勤學不倦鄉人熏其德而化爲善良者所在多有卒稱孝恪先生

李維英

孫錫珍

趙三麒

武謙

李維英字拔尤天性孝友補諸生肄業錦江書院動必以禮院長器之兄維翰貿易負逋盈萬私鬻田三百畝以償父奉先大怒寢疾不食維英聞信自書院踉蹌歸視父疾退約弟維儁同詣父榻前跪請曰兄累重負不能不償日後產業兒等仍願與兄均分大人幸無慮父大喜爲起加一餐維英事親純孝父因事嚴譴家人皆走避維英獨敬立俟怒稍平急掇他事之可博歡者以進乾隆乙卯以優行貢成均授納溪訓導父不肯就養逾年父病卒於家維英聞耗哭泣幾晝夜不食兼程馳

溫江縣志

卷八

人物

十三

三十三

歸柩前一痛幾絕哀毀如柴不御酒肉三年復居母憂服闋補鄰水教諭訓士以勵節敦品爲先躬爲表率士風丕變道光改元覃恩敕封維英父奉先修職郎母朱氏孺人維英旋里告墓焚黃畢哭拜不能起泣曰微官得邀封典而親不在矣痛何如也年七十乞休歸號雲樵老人日課諸孫耕讀撰治家條約十則建宗祠於城中作教育詩示諸孫之有子者曰性豈初生劣孟方水亦方事原關教育成敗問翁娘家居十六年門庭肅穆爲鄉閭矜式著有訓兒常話十卷詩四卷臨歿自撰輓

聯云無名垂宇宙有面見爺娘爲時傳誦孫錫珍能世其德

錫珍字捷三有至性誠篤不欺維英嘗作類我詩賜之失怙恃率兄弟同居內外大小數十口無閒言錫珍所居別業距祖宅八九里晨昏之禮雖風雨不廢奔走忘勞鄉人稱歎維英疾錫珍侍湯藥衣不解帶者數十晝夜家人來言事錫珍曰止祖病若此我尙以家爲乎爾曹自爲之耳錫珍承祖訓能世其學病革時門人朱紹濂等在側錫珍正色曰生死常事惟此心不可壞端坐

溫江縣志

卷八

人物

十四

川八

而逝

趙三麒字東垣兒時父病設香案向空祈請以身代父歿哭泣如成人鄉里稱孝子長有文譽補諸生事母至孝居喪不御酒肉廬墓三年自是不復應舉子試高臥林下潛心性命之學旁涉百氏及天文太乙壬遁無不鉤貫仰觀俯察獨有會心學者莫能測其涯畧塾江李惺稱爲西川翹楚布政使祥福修重幣聘爲子師謝不往曰禮聞來學不聞往教自是名益重廉訪牛樹梅嘗造其廬開縣李宗義督部以詩箴相遺其爲時彥推重

若此有欲爲三麒置田產者笑而謝之舉孝廉方正不就生平節峻行高一介不苟尤人所難著有易學精粹十二卷奇方輯要六卷天文會纂一卷名教範圍八卷晚歲學養益邃心神怡曠望之猶野鶴孤雲灑然塵表卒年八十六

曾學傳曰東垣先生平生未嘗受人一飯其清風亮節濁世所無余少時有志兵事耳先生名欲從問術數學一日雨後俟諸溫潭上茶寮未幾一老人皤然赤足至座間迎者三四人余未便趨謁俟先生去乃

溫江縣志

卷八

人物

十五

川八

從而後見先生就道旁買瓜余請代負先生謝不允余復從行七八里許至其門先生始回顧邀余入坐退而濯足乃出坐定慨然曰三代下功名險物也奚足圖余竦然請列門牆先生歡然與之余嘗侍先生室中臥榻前惟兩竹椅一木凳置瓦燈其上此外無一長物而先生神氣灑然言笑自若胸次無一絲掛累嗚呼是非無欲者能之乎

武謙字子卿號抑齋寄籍成都同治癸酉舉人天性純孝幼稟庭訓父廷英以武功官都司家居性嚴厲每怒

謙輒長跽請罪必俟霽顏乃起以爲常早喪母哀毀若成人事繼母如母少長能詩文豪俠自喜射洪舉人胡文魁講學香山徒步從遊自是斂華就實潛心義理淹貫古今日記所學深自策厲沒身而後已家貧授徒規度謹嚴士之佚宕難馴者及其門無不帖然就範計偕無僕挾兩生北行輪蹶塵坳中執弟子役甚恭在京邸同年生達縣吳德瀟華陽王秉恩成都喬樹枏皆嚴事之以爲畏友朝官徐桐張之洞咸國士目之謙學上宗洛閩近私淑湘鄉方慨然以經世爲志惜未及顯用而

溫江縣志

卷八

人物

十六

川七

遂歿年三十六崇祀四川省鄉賢祠國史孝友列傳

何鑑羅緗

何鑑字貢三湖南邵陽縣人道咸間由行伍投川軍立功累官至副將入籍溫江光緒初署城守遊擊有告謀逆者誣連巨紳數十人護督文格將興大獄鑑請往按卒無左驗叩院力白其誣格猶豫鑑慨然以身保之并繕具印狀事始息成都府試知府李德良派勇入院彈壓眾憤罷考文督命鑑率精兵一營往諭鑑曰文章非匪何須兵爲徒行入府院反覆開譬并請改員典試大

吏躓其請事遂息尋補城守營遊擊加總兵銜後有巡
兵趙雲鵬與某要人部下博戲齟齬械鬪某要人以此
害鑑罷官雲鵬逃逸鑑復鐫職有親友來告雲鵬所在
鑑曰彼罪不應死若被獲必殺殺人以復官吾不忍爲
也其仁厚若此光緒二十二年松潘夷叛總督鹿傳霖
委鑑籌辦糧務事平復原職署阜和協副將先是三岩
夷叛統領韓國秀往征三年未下制府委鑑率師撻伐
鑑單騎入境反覆諭之勤勤懇懇如訓子弟諸夷解甲
羅拜請降事聞賞給三代正二品封典奎俊督川奏署

溫江縣志

卷八

人物

十七

川三三

松潘鎮總兵鑑抵任懲壓冒清虧空杜供給餽遺復土
弁餉額卸番官馬幣設倉儲餉建碉築堡鎮松年餘無
不爲邊地計久遠三十一年總督錫良奏署川北鎮總
兵適拳匪初平州縣查禁習教事綦嚴會渠縣差役誣
鄉民某習拳教往捕傷斃其女眾怒聚場渠縣令遂誣
稟民變鑑聞報密稟天府天府委鑑揀員相機剿撫鑑
曰數人聚眾非真亂也動兵則眾駭而事成東鄉前車
可爲殷鑒乃檄綏定遊擊岑成元就近單騎入境風使
解散果帖服鑑爲人風裁嚴峻造次必以禮治營務析

及纖微不落深刻對親友喜談陰騭及先哲遺言恂恂若老儒事親孝父疾常左右之自臥起至飲食溺器皆躬自扶持及卒痛絕而復蘇者再坐臥不離柩側葬歸伏地不能起枕上漬淚如膏事孀母甘旨必腆雖小事必稟承而後敢爲自外歸見母言笑則喜怒則長跪引咎旣解乃起母病蓬垢侍湯藥夜禮北斗呼顛願以身代比歿擗踊長號旬日骨立哀痛之情久而不忘姊適羅早寡迎歸同居視甥若己出甥卒又恤其嫠而養其孤凡戚友貧乏者餽助無虛日絕嗣則爲祭掃歲節並祭於家有屋數十間來租者貧減之或概免不納有時反餽以錢米歲饑任賑恤尤力其他慈善事無不在施棺藥衣米不可殫述川中大吏初至者無不欽其爲人卒年八十七子安瀾附貢生試用訓導歷署井研教諭廣元訓導順慶府教授孫邦著附生游學日本十年精數學見成都高等師範學校教習

曾學傳曰何公以兵弁出身位至總戎觀其所爲則恂恂儒者氣象雖深於學者未之及也豈可僅以將校目之哉蓋卓然其爲賢者矣以斯人而隸吾縣籍

其殆邑乘之光也夫

羅緗字雲五父文耀行誼有傳緗寄籍華陽咸豐辛酉拔貢朝考二等官教諭就鮑超霆軍幕襄贊戎機以功保舉知縣分發湖北署崇陽視民如子民咸感之調安陸適夏旱軍民指淮鹽局有旱魃聚眾毀之緗聞報飛騎至眾始散局勇縛一人緗釋之鄉民畏罪聚集三千餘人抗官緗憫其愚延紳士之曉事者為約法三章一屯眾即行解散二呈請培修權局三前釋之人自行投案民皆如約緗為請於制府不戮一人而事定未幾教

溫江縣志

卷八

人物

十九

西鄉傳教下脫文一行補於此有偽職封號男女誤信者數千人緗出示云嚴拏妖道

匪案起緗訪聞有王覺一黨妖道趙明洪在西鄉傳教為民除害愚民誤從概免株累明洪乃潛逃其黨魏學潤仍暗傳教不悛緗親往捕獲不株連鄰右一人外獲入教男女名冊約二三千人緗白府守焚之學潤供明洪逃往邑邊境某尼僧廟緗立派妥役往捕未獲惟獲謀亂據甚多尼僧供明洪潛逃黃安縣紫圍河林寡婦家緗派幹役十人往捕票註只拏妖道並著名要匪不准妄拏一人明洪被獲林寡婦家得以保全緗稟大府明洪學潤就地正法外不戮一人事平人民感之入骨

尋丁憂回籍服闋補應城時崇陽令婪索溢舊規紳民
上控大府批斥令照舊有雷某刊碑立署前令捕之縊
死籠中民憤逐官閉城持槍械守四門大府委員接署
皆不去乃委緇命帶兵前往緇單騎就道民間之遂解
兵開門歡迎緇出示告勸民皆復業境內以安王覺一
謀襲省城緇於崇陽首禽其主謀熊國定覺一事遂敗
補江夏省城各營與提督安徽勇生衅兵變文武長吏
皆束手緇奉委督辦竭誠勸諭息事惟薄懲首事者一
二人以報制府制府欲殺爲首者緇曰卑職已許之矣

溫江縣志

卷八

人物

三

川三十一

若必殺之請先殺卑職事遂已調鍾祥大計卓異將北
上適蘄水何靜然作亂聚眾二千餘人豎旗號稱何五
大王緇奉制府札同兩提督帶三營往辦緇以靜然因
案拖斃兄弟兩人積忿糾眾與無端謀逆者有別力主
按兵不動出示曉諭解散脅從勸靜然據情出控免累
爾母妻子從者見示相率解散緇復再三開諭靜然靜
然亦自出首雖震懾兵威實緇之誠有以動之旬日之
間兵不血刃而事遂平署興國州及荆門直隸州知州
保升知府丁憂回川守制三年不復出楚督張之洞三

函招之皆不往川督鹿傳霖岑春煊委任全省團練保甲總局經畫周至備見所著怡雲館文牘細嘗言余仕楚二十餘年常恐心有未盡民受無窮累已卽造無窮孽司牧者宜書之座右以爲鑑見年八十六歲子四孫五長興應廩貢生候選訓導法政學校畢業

曾學傳曰余生平罕人事仕宦尤無往還雲丈雖鄉先輩省居亦僅識其面事賢友仁余殆忘焉今修縣志雲丈年八十六矣雖生存在所必述而調查表所書甚畧余乃親往詢其事獲覩所著蘄春記畧始知溫江縣志

卷八

人物

三

三

孝友

宋 謝榮

謝榮生有至性不染時好嗜讀書躬耕養母超然無求於外門庭秩如奉母飲饌必躬自捧進溫清色養始終不少衰嘉魚魯儒爲作傳

清

劉坤

孫漢鼎

曾孫汝欽

劉坤其先楚人祖朝弼遷蜀父宇舟仕明爲建義將軍

丁明季棄官歸隱卜宅循陽之中壩坤有學行避世教
授五經崇禎十六年流賊入川所至蹂躪僞將軍王運
兵困中壩中壩者圍繞大江縱橫數百餘畝鄉民以亂
故萃處焉賊兵突入坤倉卒負老母赴江江故有深潭
曰雙漩子不可以尋丈計坤入水兩腋如翼乘風竟浮
江得免亂定徙居溫江遂爲邑人時流氛雖息草竊者
或倚強兼并坤糾集義勇捍衛一鄉人咸倚重坤爲疆
理戶口俾成家老弱者畱養之坤孫漢鼎曾孫汝欽能
世其德

溫江縣志

卷八

人物

三

漢鼎字君謨蚤失怙奉羸母敬養篤摯躬耕讀書布衣
蔬食晏如也平居未嘗疾言遽色宗族鄉黨之貧者稱
貸不求償嘗云涉世之道儉於己功於人聞於才懋於
德聞者以爲名言年六十八以母喪毀疾卒雙流解纜
以詩哭之有青山世澤煙霞外白髮泉臺杖履隨之句
爲時所誦

汝欽字敬五生而奇偉讀書知大義事繼母敬養備至
異母弟幼多不率爲人誘煽汝欽致諸少年觴之曰吾
惟此弱弟諸君幸規之以正毋令貽親憂今不然是子

之德薄得罪於諸君耶抑弟實爲諸君累耶言畢泣下
並出數百餘金償其飲博之費諸少年咸感愧謝去多
爲正士有妹適人夫亡子幼殆難自存汝欽爲經紀質
田十餘畝卒勸節撫孤成人尤禮下賢士鄉先生之有
文行者延款無虛日家故有田園悉所出以贍宗戚待
舉火者十餘家人有困匱無問知與不知必爲之謀雖
典質弗恤也晚年家益窘而扶危濟難不少衰或見其
揮霍太甚規之汝欽曰吾寧封己自利以爲一家計乎
抑惠朋友而勸仁讓也年五十卒子潞沅潞別有傳沅

溫江縣志

卷八 人物

三三
川文

入雙流籍

鄒 璋 王文煥 王鶴年

鄒璋事繼母孝偶以故詣省聞母病劇懷藥馳歸適楊
柳江暴漲眾勸少待不聽策馬赴湍流人馬俱溺死聞
者哀之

曾學傳曰璋孝不減於劉坤坤負母浮江獲濟璋獨
沒於鴻濤駭浪中生死固各有命哉吾欲問諸水濱
王文煥康熙癸巳舉人博覽經史不干仕進性篤孝終
身孺慕親歿歲時祭奠輒垂涕追思不忘居鄉黨對老

者以敬少者以慈尤矜恤貧寡藹然仁厚爲閭里矜式年逾五十卒士林惜之

王鶴年字寧甫王和中弟乾隆丁酉武科解元官黎雅營守備時太平無所用武而望雲之想時切一日旅邸題壁云郵亭遠望日西斜卸卻征衣卽是家何日萱堂承色笑四時休息話桑麻未幾卽告歸里與兄同學昆弟怡怡繞膝承歡同里葛運隆稱其忠孝傳家淵源有自云孫侃別有傳

張開羽 朱世璉 蔡占輝 程步乾

溫江縣志

卷八

人物

一

張開羽乾隆歲貢生事親至孝丁父憂旣殯築室墓場泣血三年未嘗飲酒茹葷邑令旌其孝爲立坊

朱世璉好善喜讀書誠於事親居父母喪先後廬墓六年

蔡占輝監生幼失怙躬耕奉母母歿周年食粥廬墓三年尤樂善好施卒年八十四子向陽附貢生孫維新維城均附生維藻廩生

程步乾字連三忠厚醇謹事親篤孝父母歿皆廬墓百日卒年八十四

曾學傳曰廬墓非古也骨肉歸於土迎神而反之室朝夕歲時奠所以尊靈魂也故聖人不爲廬墓之禮然而孝子有爲之者不忍委其親體於土而忽然去也故君子有取焉

李 莊 姜鳳翽 殷孝子 余思安

李莊年十二父母皆病疫先後剗左右股以進親疫俱瘳後遭母喪莊號哭彌年父感誓不再娶族鄰稱爲孝子

姜鳳翽年五十六父母病篤鳳翽剗股以進并祈天默

溫江縣志

卷八 人物

三五

佑尋瘳

殷孝子逸其名家貧推獨輪車爲業誠於事親母臥病醫藥罔效剗股以進母病旋瘳鄉人稱孝

余思安事親孝父顯臣病服藥罔效剗股食之親疾旋瘳

曾學傳曰剗股不可訓也廬墓剗股皆賢者之過君子取之不沒其誠也蓋善善從長春秋之義云

夏世綸 王思雍 弟思友 李品正 王錫恩

夏世芳 王天成 子安武 劉儒山 宋天中

夏世綸早失怙恃廢書經紀家政延師訓諸弟稍懈痛哭戒勉弟世緯世綱世超成立皆惇行同居共爨一堂雍睦內外無異言

王思雍與弟思友終身同爨友愛不衰尤好周急昆仲年近八十猶健

李品正性質直孝友事親先意承志不飾虛文其兄卒遺二子一女品正撫育如己子恩誼篤摯閭里稱之

王錫恩少讀書知大義仲兄夫婦沒遺二子一女均幼錫恩視如己子備極教養至成立而不懈

溫江縣志

卷八

人物

三

川文

夏世芳武生事親竭誠兄嫂沒遺二子一女撫育教訓與己子無異

王天成字默欽幼孤與異母兄天柱各爨兄嗜賭業盡天成年已長屢貸兄金皆不振天成白母曰兄弟天倫也何忍視吾兄坐困兄如改過遷善願與合業天柱聞之截左手食指以示遂合爨同居兄弟力農二十餘年增置田產近四百畝母病天成與兄衣不解帶侍奉左右母沒後天柱亦衰病臥牀天成親爲調治煎藥晝夜不懈及卒棺殮殯葬亦如母喪兄子安宇方幼讀及長

就外傳行爲不羈累債千金天成乃迫令歸家務農爲償其債時加教導晚歲尤樂施濟年近八十生齒蕃衍始將產業與姪均分年八十五無疾而終子安武有父風

安武武生藍逆之亂安武弟四人房舍穀米農器均被賊燬亂定安武爲諸弟置舍購器接濟米二十餘石均得復業生平好施性慤直鄉人嚴憚卒年七十天成曾孫允中第一屆參事會參事員

劉儒山少喪母及長兄弟四人析爨各分錢數十貫儒

溫江縣志

卷八

人物

三七

川三

山獨養父勤耕苦積置產百畝父歿獨任喪事殮葬如禮諸弟相繼歿皆儒山棺殮購地安葬并提挈諸姪撥佃耕栽俾循正業子孫承順家道益昌卒年九十七子松雲惠雲友愛敦睦諸孫皆厚重能恪守家風

宋天中字輔臣監生事母孝兄天喜早卒遺腹生子天中撫姪如己子恩誼篤摯尤樂施濟勤公益人有忿爭輒爲婉勸和解里黨賢之

祝世楷

王煇梧

子德淵

王廷炳

楊忠恕

宋鎮川

雷澤咸

周文棟

祝世楷字敬堂性孝友父成樟敦樸倉吏某虧公數千金懼事覺誘成樟入貲爲後吏未幾事發令責成樟盡數賠償成樟鬻田產不敷下獄世楷涕泣陳詞願以身代令不允世楷依庭牆哭日夜不絕聲令感其忱許之世楷在獄年餘破家償足始得釋乃舌耕爲業孝養有加居父母喪哀毀骨立先後廬墓各三年世楷善醫每以濟人爲懷不計酬報得以存活健全者甚眾生平尤樂勸人爲善循循啟導親族鄉人多被其化

王煇梧一名子晉字樂山諸生七歲而孤事母孝母病

溫江縣志

卷八

人物

二十六

思食香油水粉時久雨煇梧行泥濘中赴邑親購距家三十里歸已暮將及門忽仆地香油水粉在手無少傾側其誠孝如此弟某夫婦早死遺子三煇梧教養成立悉爲完婚度皆能自立始析爨里居尤好義能化人爭執有長厚風子德淵

德淵字炅柎幼有至性劬學父誠其節勞夜候父寢乃篝燈暗誦昧爽輒入父室就榻前屏息柔聲問安父熟睡則徐徐退冬夏溫清朝夕視食維謹親或怒顏色愉愉不少改母中風臥牀褥時里中同病者皆不起德淵

深夜焚香向空默禱以身代後母病瘡而德淵死矣死
之七日家人忽仆泣口喆喆德淵語也自言命盡惟不
克報親恩爲憾哭勸其妻勵節事翁姑代盡已職妻俯
首不答乃多方解慰父母自是或間數日或數月一至
親病必至至輒附家人體言語若平生人目之爲孝鬼
後德淵妻更適人數年死煇梧自傷之嗣時年已五十
餘娶妾連舉三子

王廷炳字炳堂事親誠孝父歿適藍逆逼境家人畏賊
皆遁廷炳痛父柩在堂與妻朱氏扶母入鄰室夾牆內

溫江縣志

卷八

人物

三

避賊獨守殯不去賊至欲毀棺廷炳泣免賊割髮辮拉
以去數里許廷炳以有老母在向賊泣訴賊感其孝釋
歸葬祭其父如禮事母左右侍養益謹尤樂施濟里中
貧者多食其惠有元旦日路死無歸者人皆以爲不祥
避之若浼廷炳獨惻然助以棺且殯之其仁厚若此子
際昌武舉希曾歲貢生

楊忠恕字心安事親純孝庚申藍逆竄永安場眾皆逃
避忠恕父病臥牀褥不能起忠恕侍湯藥左右不離跬
步賊至欲焚其廬忠恕曰寧殺吾身勿傷吾父賊感其

孝魏以厚貲而去忠恕一生樂善好修喜化導鄉人懇懇至老不衰

宋鎮川生平篤於孝行藍逆犯境鎮川父年老命鎮川去避賊鎮川泣曰父老矣兒去父將何賴遂隨左右跬步不離未幾賊至以其父年邁釋之竟掠鎮川去至崇慶賊爲雍睦團所敗勢披靡鎮川被擄將殺之忽有人大呼曰此宋鎮川也遂免得歸卒年七十八

雷澤咸字厚庵歲貢生事親篤孝藍逆之亂澤咸負母逃難卒免母老病不能行一舉一動皆澤咸扶之四年而終

溫江縣志

卷八

人物

三

周文棟性敦厚樂善好施姪分爨後負債纍纍致困文棟復令同居代償債項若干藍逆入境或言文棟欲聚眾抗賊賊聞之羣入其室乃闔無一人惟獲一施棺愿板訝然曰善人也相戒勿燬雷紅布數尺編炮一聯而去子興廉孫維楨均庠生

張來際 黃錫鑾 雷豫章 江聲 潘鴻鈞

鄭西山

張來際字子端廩生蚤失恃父不再娶來際事父誠孝

館成都富室每餐必具數殺來際惟食一殺餘不下箸
東主質其故來際曰老父在家未嘗日備盛饌忍獨享
乎父病來際左右侍養衣不解帶者數十晝夜父歿疏
食廬墓三年後厯官汝川廣元遂甯訓導朔望必集諸
生於明倫堂宣講聖諭以砥勵名行勗諸生嘗輯呂近
溪小兒語呂新吾續小兒語李西漚老學究語題曰韻
語通刊布里塾以訓童蒙所在士風丕變又刊亞拙醫
集濟世好恤故舊時或出衣物典質以應不少吝生平
與物無忤和氣迎人卒年八十餘

溫江縣志

卷八

人物

三

川

黃錫鑾字黻卿諸生幼時父令習耕母劉不可乃得從
學母歿時錫鑾在塾聞耗奔喪號哭入門仆地匍匐至
喪所哀慟垂絕久乃復甦遂致噎疾喪葬後又懼無以
慰父時勸父續娶既爲父親迎繼母楊以歸事事皆曲
慰堂上心父歿家事悉聽繼母勾筦出入畧不過問家
落繼母始以忤錫鑾錫鑾無少怨雖極艱困未嘗缺甘
旨妻有少忽卽嚴責之黃氏族百餘戶又本收族敬宗
之義爲建宗祠勒家訓八條於石族人咸守其戒子蘊
濤亦入邑庠孫光顯四川優級師範選科學堂畢業清

部試師範科舉人長邑校四年著有成績

雷豫章字雨樵歲貢生父天綬性嚴重生平多善舉年九十餘豫章謹事之終身如一日有弟早卒豫章視姪如子同居三世不忍分析以舌耕爲業崇尚節儉家用以饒嘗論治生之道曰吾非能有所益能無耗而已矣子二人孫十餘人悉教以耕讀孫有學生者所娶婦亦學生豫章甚喜人皆目以爲瑞卒年八十四長孫綸曰本警察學校畢業曾任縣警佐

江聲字小樓歲貢生父永湛居家崇仁讓聲事親克承

溫江縣志

卷八

人物

三

三

其志弟楨從聲學補諸生早卒遺三子一女皆幼聲視如己子備極教養及成人爲之婚嫁同居六十餘載未忍分爨後年邁將已所置產業均分與弟婦生平行誼端方與人交辭色和藹令人起敬所爲詩自名隨遇集卒年八十子國鏞庠生

潘鴻鈞字健亭歲貢生天性孝友館於鄆父病辭歸侍疾不解衣帶者數十夜授徒所入脩金時分與弟年六十八無疾而終

鄭酉山名佚廩生性誠孝劬學敦行能文尤善書爲學

使某激賞欲拔之貢成均臨場西山聞母病毅然歸學使點名畢西山不至命人沿街傳呼久乃掩門人多惜之其篤於天性而輕浮名若此

李敬壽 余必恭 高鳳樓 李萬統

李敬壽事親純孝服勞維謹父暴卒敬壽號哭絕聲水漿不入口者七日及葬躬負土成墳而廬其旁母涕泣止之乃歸事母益謹朝夕必詣父墓如生前定省禮後賣卜城中經父墓必泣拜晚歸必獻食終歲風雨如常墳前土當兩膝處草爲不生一日母思食楳菌時隆冬

溫江縣志

卷八

人物

三

三十一

菌已枯落敬壽手頃筐披榛傍林緣溪徑覓久之無所得忽入茅叢中見簇簇大小數十莖皆楳菌也擷之歸家人咸以爲異居母憂哀毀一如喪父之誠年七十卒余必恭字雨帆蚤年失怙事母至孝母膳必躬親新爨洗必親爲拭跣浣膝幅不委妻子曰人子初生在襁褓中母爲滌齒溺日頻頻不厭今敢厭母哉弟謙恭允恭皆感其孝每出必留一人奉母歸必面陳樂事娛母心有失意皆匿不以聞母年老夜輒不寐必恭率諸弟及妻子更番迭進團團絮語俟熟睡乃出數十年如一日

諸婦化之妯娌間無詬誶聲鄉人有兄弟爭產者質於必恭爲陳說大義懇款動人往往聞之泣下兄弟如初與人交辭色和藹令人起敬鄉里翕然稱之居母喪哀毀盡禮葬不數月以疾卒

高鳳樓字卓五事母誠孝常率弟輩五人歡聚一室藹然孺慕母病躬侍湯藥跬步不離親憂亦憂親樂始樂處兄弟間但聞笑語並無惡聲家庭上下數十餘人循循守禮未嘗稍有閒言其孝友之化若此

李萬統性渾直業耕事親純孝溫清定省未嘗或疏父母歿葬宅右萬統日必省視如生前光緒中族人盜賣其高祖墓地與豪家莫敢與爭萬統哭泣於庭數日感動族眾羣起控訴於官卒收回墓地弟萬寬貧無立錐純賴萬統度活死復爲之營葬里中修橋築路濟貧澤幽等事輒捐重金爲助生平與人無爭家中男女數十丁口五世一堂雍雍于于各安其業萬統年九十鄉人以其行聞於官省公署旌其門口美意延年

程遇陶 胡元松 陳有福 彭德明 王應斌

程遇陶性孝友居父喪廬墓守制忌日必哀母病三載

扶持調養竭誠爲仲兄償負索還券盈篋悉焚之仲兄及季弟夫婦先後卒遺子女六人悉撫養成立爲之婚嫁親鄰貧不克殮葬輒資助之年八十二卒前數日謂子襄堯曰今四月二十八日吾逝矣汝勉之無以寸進自限至期午後果卒襄堯諸生亦謹厚爲一鄉端士胡元松年十八失怙事母誠孝弟某蕩檢無行母欲逐之元松向母泣請將父遺金四百金與之半爲貿易貲未三年蕩盡落魄在外元松尋歸罄父所遺金與之又蕩盡元松私與金百兩然終不克成立而友愛不衰元

溫江縣志

卷八

人物

三五

松二十八歲妻死遺子女一欲續娶母曰娶後婦須擇賢不則汝子女受虐吾心何安元松受命久之不遂而母歿自此誓不復再娶或勸續絃元松曰恐娶不賢傷母心於地下耳其行詛敦篤若此鄉人稱之

陳有福性孝友事孀母善承其志弟有忠已分爨妻亡續娶復死所遺子女呱呱家益日窘有福急召弟合爨以慰母心後又別佃田有忠往耕屢欠租有福又代爲籌償母歿時年九十三有福已逾七十皤然白髮能盡哀禮子四皆教以耕讀生平尤隆重師道矜恤貧寡終

身未嘗涉一訟卒年七十五子樹熙歲貢生

彭德明字子仁八歲喪父哀泣逾成年有異母兄一同胞姊妹二兄善賈迭議分產德明日僅此薄田四十畝不分由兄握筦必欲剖之母膳與姊妹妝奩弟願自任無庸別議宅後有塋地兄貪善價售之族人德明請與母畱一壽藏不分其價嗣兄歿無藏地德明又以母壽藏讓兄而別爲母覓地於雙流母年八十餘病德明親侍湯藥衣不解帶者十晝夜母歿痛而氣絕者三其他慈善尤多一生戒食牛魚雞鴨等肉卒年七十一子漣

溫江縣志

卷八

人物

三六

三十一

庠生

王應斌性質直兄弟三人有先人遺產二十餘畝各分析異居矣其弟應清卒遺一子尙幼應斌憐姪母子孤苦召歸合爨以姪質弱不任耕延師課讀己日督四子耕田不少寬假後置產至二百畝將剖分與姪或曰今所積累皆君勤儉所致君四子姪僅一人若以五股分視合爨時猶增數倍誰曰不宜應斌曰如君言姪雖聽命如欺死弟何卒析其產爲二與姪均分

曾學傳曰國家如設孝弟力田科以王君當之誠無

愧色其後之昌可卜矣吾但不識其姪何以報乃伯父也

張洪德 吳鴻圖 魏有方 竹夢蘭 羅裳

張洪德字星垣生有至性補諸生不事帖括養親誠孝里中稱孝子友愛兩弟出入必俱尤睦鄰族同里鍾某爲鉅盜誣陷被制府親兵緝獲洪德挺身謁令白其冤得釋人咸義之同治甲子歲饑獨力捐米十餘石親率家人煮粥於吳家廟以濟里中貧乏依以爲命者數十家尤知醫善治喉症應手立效未嘗受謝生平凡鄉鄰溫江縣志

卷八

人物

三

川

喜憂事必衣冠親往慶弔舉止端嚴動必以禮爲閭里矜式

吳鴻圖字思古諸生父患背瘡親爲吮膿血侍藥衣不解帶數晝夜邑士陳式昌李光裕侯澤龍皆鴻圖師三人皆貧式昌歿鴻圖爲買棺以殮并養其妻光裕歿棺短紆膝以殮已二十餘年鴻圖不忍爲易棺購地改葬殺掃不衰澤龍解館後養於家數年乃去其隆師若此子慶熙由辛亥起義官至四川陸軍二師獨立旅旅長見四川督軍署一等諮謀官

魏有方字全之天性孝友幼家貧不能卒學年十四赴省從事木商業成歸養父母謁誠盡歡歿葬如禮後獲贏餘先爲兄有貴置膳田十畝契約交執光緒初大府籌賑有方報捐千餘金知府黃雲鵠賜詩褒嘉給予國子監執照晚年家居膳養悉與兄均恐子孫不達其意嘗書格言示志曰立志不隨流俗轉存心學到古人難生平言笑不苟坐立不倚足爲閭里矜式年八十四無疾而終

竹夢蘭名佚布衣畱心經濟事母孝母食必立於側進

溫江縣志

卷八

人物

三

川四七

羞膳不假他人母歿居喪哀毀骨立廬墓三年服闋從戎至湘不遇旋里著有焚餘詩集二卷卒年八十
羅裳字俊之爲人純謹補諸生杜門寡交惟在家事親定省甘旨未嘗少缺親疾侍養跬步不離居喪備極哀痛終身不干外務人咸目爲端士

劉學仲 魯 緝 張 烈 王三錫 余廷謙

李邦瀚 鄭春元

劉學仲字錦屏性孝友兄弟五人析居父母養膳銀爲執筦者耗折學仲獨舌耕養親昆弟先後病亡亦力爲

營葬年九十尙康強門人副貢唐燮元爲報老請旌
魯緝字澤臣廩生性孝友大母病緝時在塾大母念之
召歸緝侍奉罔懈衣不解帶湯藥必嘗而後進病革不
離左右母蕭後患瘵緝侍奉亦如之生平力學嗜抄書
以助記憶故博聞強識人罕能匹課徒喜惠寒賸王銘
新幼窘緝飲食教誨之銘新卒以成名緝家本不裕舌
耕爲業稍積貲悉以與弟貿易折耗無一怨言後析爨
除釜甑書籍日用器具外一無所取其篤厚如此癸丑
銘新官富順遇變幾蹈不測緝憂憤而死年六十六

溫江縣志

卷八

人物

三

張烈字樹之諸生性誠孝凡事惟恐失親之歡館鄰林
氏家三十餘年親在日必歸省親者三親歿而後已人
稱其孝

王三錫字命侯舉人家貧有先人遺田十餘畝三錫悉
以與弟己舌耕爲業歿齒無怨言

余廷謙字達三諸生兄弟已析爨其兄負債纍纍憂鬱
成疾廷謙出其課徒脩金爲兄償負兄病以瘳親心大
悅人稱孝弟

李邦瀚字世榮諸生性謹厚尤敦孝友父母年老諸弟

別居邦瀚恐傷親心乃貸金佃田共耕以娛親老
鄭春元字品三諸生性孝友父國治揮霍好施春元先
意承志每節儲以待急時雖借貸不令父知父母有疾
衣不解帶藥必先嘗而後進兄春霖早卒無子嫂楊守
節春元以子書爲之後督課書與姪詩皆入邑庠詩以
增生就學省高等學堂爲力營膏火惟恐不足里中善
舉必爭先恐後雖費不惜鄉黨賢之卒年七十一

李逢時 田樹椿 何紹安 陳龍坦 張獻文

李逢時字行生雲樵老人曾孫少習家庭之教長補諸

溫江縣志

卷八

人物

四

生母卒時父錫璋年逾五十欲續娶恐子婦不安逢時
力勸父娶父曰晚母難事逢時曰爲人子者誠能盡子
道未有難事之母父乃允後娶何氏老女逢時往迎執
子禮甚恭何來歸後逢時率妻恪盡子婦之道繼母育
一子逢時友愛甚篤父主萬春書院講席逢時數日必
攜弟一往以博父歡娛父歿後逢時教弟詩書起居不
離鄉人稱歎

田樹椿字子仁性孝友襁褓喪母甫數歲又喪父育於
兄嫂幼端謹好學長補諸生終其身與兄嫂同居事之

如父母兄故不諳生計家中落樹椿處之夷然課徒所入脩金悉以奉兄不敢私有兄歿署其門曰無兄誰愛我有姪世相親其天性之篤如此居常以不及見母爲憾人言母塋犯水卽卜改葬開棺時泣血欲死及遷葬欲廬墓親族以道遠家貧勸止樹椿乃素服不茹葷酒重喪三年其教門人以不自欺爲主四十後嗜易自修尤密卒年四十八

何紹安字小亭事親盡禮鄉人稱孝子家貧舌耕爲業課徒以孝弟忠信爲主旨受其教者多不失爲善類卒

溫江縣志

卷八

人物

四

年六十八

陳龍坦事親竭誠母病侍左右調羹和藥日用飲食必出己手母歿哭泣盡哀水漿不入口者數日卒年五十五張獻文父充里中鄉約爲匪所殺獻文時十餘齡鳴官匪逸獻文謂母曰殺父者吾仇誓不與共戴天遂購刀一柄日磨礪尋仇民國三年陡於公署前遇殺父者力追至西門外殺之自投官請罪官廉得其情以事聞上官拘五月遂釋人稱其孝

忠節

後漢

常洽 常頎

常洽字茂尼自荊州刺使遷京兆尹侍中長水校尉以兵衛大駕西幸李傕等作亂常侍衛天子左右爲傕所殺

常頎諸葛丞相亮領益州牧頎爲從事牂牁郡丞朱褒領太守恣睢丞相遣頎行部至牂牁聞褒有異志頎收其主簿按問殺之褒怒攻殺頎

明

溫江縣志

卷八

人物

三

三〇八

陳星聚 何如偉

陳星聚諸生篤學有志操崇禎十七年獻賊據蜀藩府稱帝開科取士逼令州縣諸生赴考星聚曰我讀聖賢書豈應賊試者抗不就道賊迫之星聚罵賊赴水死何如偉成都人崇禎十二年己卯舉於鄉十七年獻賊據成都勒仕如偉不屈遁去賊平入籍溫江時兵燹後如偉抱其所學竄身荆棘者數年亂定鄉士遺黎及流氓氓子弟率來就學如偉開門授徒斷斷不勸歌誦之聲聞於荒野終歲足跡不履城市卒年八十二

任氏族人 新江乞人

任氏族人者大理卿漢之裔也名字皆不詳任氏族蕃衍西至三渡水東北至新開江多任氏田宅獻賊據成都闔族抗僞命團家聚勇與賊相持於長灘賊勢熾不支戰敗全家覆沒

曾學傳曰大理爲有後矣任氏忠魂長在鼻城之隈大江之湄吾鄉人千秋俎豆祀之可也

新江乞人者不知何許人亦不詳其姓名崇禎十七年夏一日乞人於邑東長安橋上以石支瓦釜鬻食忽有溫江縣志 卷八 人物 聖 人號於橋頭曰三月十九日李自成陷京師崇禎帝縊死煤山矣乞人瞠目而起擲其盃曰從今不喫闖王飯遂投新江而死

曾學傳曰闖獻肆豺狼梟獍之惡恣殺生民以爲革命漢族猶有遺種幸也孟子曰蹴爾而與之乞人不屑闖獻之待人類豈特此哉若乞人者所謂不失其本心者也

清

葛立程 史載陽 唐文斌

葛立程字行素浙江黃巖縣人少讀書通大義長投筆從戎以功累官山西潞澤營都司康熙十二年擢四川成都城守遊擊入籍溫江康熙十八年吳三桂之變川撫黨附之陰奪立程兵符逼令從逆立程不可逮之獄遂自毒死誥授威遠將軍子秉敬別有傳

史載陽爲人英偉咸豐庚申藍賊犯境駐紮和盛場賊兵四出掠載陽去欲降之載陽不從罵賊而死

唐文斌年七十三藍逆之亂賊入其家文斌掀髯怒目厲聲罵賊賊焚其舍殺之及其妻子

溫江縣志

卷八

人物

四

川文

曾學傳曰吾邑文獻凋缺成仁取義之士可得而述者寥寥孟子曰所欲有甚於生所惡有甚於死者非獨賢者有是心也人皆有之若史載陽唐文斌身在編戶而臨難不屈精神凜凜豈非羞惡之心所激而然哉

行誼

蜀漢

常播

常播字文平仕縣主簿功曹縣長廣都朱游建興十五

年被上官誣劾以逋沒官穀當論重罪播詣獄訟爭身受數千杖肌膚刻爛毒痛慘至歷三獄幽閉二年有餘每將考掠吏先驗問播不答言但急行罰無所多問辭終不撓事遂分明長免刑戮時唯主簿楊玩亦證明其事與播辭同眾咸嘉播忘身為君節義抗烈舉孝廉除鄴長年五十餘卒書於舊德傳後縣令潁川趙敦圖其像贊頌之

明

趙時英

溫江縣志

卷八

人物

四十五

趙時英爲人力善勤本遭明季獻逆之亂宗支屠戮殆盡時英奉繼母張潛伏得免於是母子相依殯殮先骸守護田業九載繼母歿葬後時英念兄時俊宦滇未歸乃往尋兄中途聞滇亂遂阻復還耕居卒年七十五孫謨清增廣生曾孫廷儒別有傳

清

胡時超

鄭萬鍾

竹世濬

劉白沛

陳時惠

胡時超太學生讀書明大義持躬履正垂意風教鄉賢任大理墓地爲居民侵占時超慨然捐錢二十千贖還

侵地築牆垣招佃看守以時祭掃又捐貲創建文峯閣於學宮前南城上以培文風其生平好義若此鄭萬鍾字介然生平尙義有盜稻者爲僕所獲釋之戒僕祕其事有客貸金貿易不能償還其券尤喜建橋以便行旅

竹世濬附貢生爲人性行端介好施予救裁恤患不吝千金和盛場火出米賑濟被其惠者甚眾藩司表其廬曰義周里黨

劉自沛貢生爲人厚重慷慨好施濟全集鄉火日給米四石以恤裁困如是者月餘鄉人義之

陳時惠無子買一妾係夫貧無賴鬻妻度日者時惠憫之助以金帛送還其夫令聞書尙義宜男扁旌之已而妻舉一子人以爲作善之報

孫萬先 徐步階 曹國相 董常舒 陳永祥

孫萬先字後庵家貧業醫頗精遇貧病者給藥療之不取值貧歿不能殮更施棺埋瘞卒年九十七

徐步階字廷儀生平好善樂施乾隆戊申獨力創建積功橋嗣鄉人重修安阜橋復捐百餘金助之晚年猶樂

善不倦卒年九十五子進德崇德庠生懋德明德監生曹國相素好義施田四畝入養濟院其子步青步雲步瀛皆克家國相年九十四康健如昔閭里僉稱人瑞董常舒樂義好善族黨有窘者不時仗助遇婚嫁喪葬輒助貧人債不能償則給券付之並諭後人毋以此爲口實卒年八十一

陳永祥字蔚齋嘗拾遺金還其人不受謝子五人皆克家四子憲綸喜善每施棺給貧不能葬者憲綸子柱能繼前志人稱積善之家

溫江縣志

卷八

人物

四七

劉天壽 王朝陞 余向仁 傅維孝 羅文宣

曹文耀

劉天壽性好善傭工積百餘金傾囊建橋落成里人卽以傭工名橋後里中萬春金馬二橋傾圮復領眾捐募重建

王朝陞爲人傭積資悉以濟戚族周貧乏里中有土橋久毀行人不便朝陞商於主以己工資重建主曰君老矣其如後何朝陞不聽獨工修造橋成名曰長工橋橋畔種柏二株今鬱鬱蔥蔥已大數圍矣

余向仁性樂善建修德合橋屢圯募補不給自捐金九次

傅維孝好善樂施邑南靜居院門外有橋傾圯捐資重建又捐金百餘作院中焚獻之資先後培修古橋十餘處鄉里皆稱義士

羅文宣公直好義性謙讓勸人戒訟一生不上公堂有人借金五十歷久不償取其券還之毫無德色子含章入邑庠

曹文耀拾遺金百餘兩還其人分金謝不受其人贈以

溫江縣志

卷八

人物

四

聯云不貪方是寶作善定延祥

雷陞福

子鷺山

孫應祥

陳懷斗

劉應魁

楊

萬全

徐克誠

雷陞福性豪爽樂善好施年九十下見玄孫五世同堂子鷺山武生克繼其志爲人剛正好義獨力修李村堰孫應祥

應祥字東生性至孝嗜善尤隆重師道好周寒素親故貧乏借貸積款數千金不能償應祥悉取券焚之生平容止端莊與人交和藹可親年逾八十猶能小楷鶴髮

童顏無疾而終子復益震恆豫復附生益恆均廩生

陳懷斗字裕光初本寒儒杜門授徒絕跡不履城市教子勤耕苦積家致饒置田數百畝歲入租未嘗市售惟於門前零售與里中貧者價絀而量贏人咸德之懷斗尤精岐黃為人醫未嘗受一錢謝生平行誼悉忠厚有古風下見玄孫五世同堂享年九十八無疾而終

劉應魁天性孝友和平樂施鄉里稱善人年九十餘下見玄孫五世同堂應魁曾孫鴻泰庠生候選同知玄孫開基庠生候選訓導又有楊萬全年九十一子春貴年

溫江縣志

卷八

人物

四九

七十一下見玄孫五世同堂

徐克誠武舉以勤儉興家終身不茹葷不衣帛上有母王氏年九十下見曾孫五世同堂

苟維楷

子煜田

陳開泰

幹履鑑

彭樹琳

苟惟楷為人忠厚矜恤貧苦提攜親族樂善不倦吳場文武宮捐田八畝鎮子場關聖宮捐百數十金其他施予不可殫述且居家有法度壺內外防尤謹婦女年未五十不得入廟觀劇其家規之嚴類此季子煜田能世其德

煜田性剛直寡言語好施濟如其父兼通釋老奇門遁甲堪輿等書中年以後益務靜修夫婦皆登上壽四世一堂道光二十六年奉朝旨予正八品官褒曰皇恩寵錫卒年九十七歿之前數日命子培蓁柬邀親族會飲言別至期沐浴衣冠而逝

陳開泰字星楷父文德官守備由河南分發四川提標中營供職入籍溫江年九十母王氏年九十七開泰爲人操履方正不苟言笑里中浮薄子見之咸肅然起敬常戒其家子弟曰吾家世守清白汝等讀書宜求實學

溫江縣志

卷八

人物

五十一

慎勿競時尙染污俗致墮先人緒年九十三妻王氏年九十五兩世皆壽考齊眉子相廷能世其德孫應選曾孫秉離均能詩畫工大小篆隸

幹履鑑字清一治家有度無惡聲遠色子孫感之皆循禮法生平與人無忤鄰里有相競者履鑑曲爲勸導數言而解好吟咏卽口占亦清妙卒年八十九下見曾孫四世一堂

彭樹琳性情敦厚有古風同胞七人皓首親睦終身無閒教子孫務崇仁讓卒年八十一弟樹萱七十九樹蘭

八十三樹葵八十樹璋八十三樹芳八十四樹華八十

二

夏天順

子世超

孫瑞雲

王文淵

子萬華

孫

炳星道昌

夏天順由湘入蜀家於邑業商起家親族及同鄉有李來汪劉譚王數姓後至邑者均不時飲助讓居街房及水碾不索租質邑令胡之富書孝友傳家劉有儀書好善樂施扁表其門卒年七十八鄉人哀之長子世綸別有傳季子世超亦能世其德

溫江縣志

卷八

人物

三

三〇文

世超候補布經歷博學多能爲人正直素爲地方官吏所倚重經理義倉城工書院養濟院軍需等項皆悉心周畫捐金不吝其他賑給尤多監司大吏迭以慕義急公善人是富扁額旌之子瑞雲

瑞雲亦好修試不售捐知府職未出仕鄉居樂善同治甲子斗米銀一兩五六錢瑞雲辦賑自捐米十六石嘗刊布同善錄丹桂籍等書勸世校官左廷元李芬常與往還

王文淵性敦篤嗜善邑西二里德通橋跨楊柳江當孔

道舊爲木梁屢圯文淵獨力倡修石橋至鬻田六十畝
家產耗落沒齒無怨子萬華

萬華遷全集鄉復以勤儉起家置田數百畝藍逆亂後
里中飢饉萬華賑恤頻年鄉鄰稱頌萬華子炳星道昌
昆仲復倡修清遠橋行誼皆有祖父風道昌字朗山同
治甲子中武科鄉試揀選兵部差官爲祖文淵父萬華
請誥封武德騎尉炳星子建極諸生作賓入武庠道昌
子鎮邦武生觀光武舉

段繼旺

羅文耀

張鵬霄

張貴隆

戴錫川

溫江縣志

卷八

人物

五

川人

段繼旺字達齋家饒樂善里中男婦老弱疲癯殘疾孤
寡者悉養於其家而授之以事如餒豬擷菜採桑飼蠶
之類各隨其力之所能者爲之人無不响响以爲得其
無歸者生養於其家而死爲之葬里中進士徐從樞高
其義爲作一行先生傳以風世且述其里夾道桑陰翳
蔽天日奇花異卉錯雜其中其居環繞溝渠雅占林泉
之勝迄今猶令人想像不置云子奇文監生孫龍章庠
生曾孫毓棻副貢

羅文耀字奎杰性好善樂施予見人困急適己乏爲稱

貸以濟至賣廬舍不惜生平喜誦唐翼修人生必讀書
恂恂敬恭善氣迎人老而益懋嘗充軍左都司藁書遂
寄籍華陽以子姪貴始辭退安養年七十七無疾而終
卒之日貧民乞丐聞耗奔哭不絕於路長子綸早歿孫
遵祖官江蘇知縣次子緡咸豐辛酉拔貢官湖北知縣
別有傳

張鵬霄以守備鄉居喜爲人排難解紛里中赤貧子悉
爲收養量力授事俾至成立尤銳意農田修築梁堰惠
利地方年七十八無疾而終弟鵬萬榮祿大夫宦蹟有

溫江縣志

卷八

人物

五

四八

傳

張貴隆字德三家富歲入租米七百餘石除家用外悉
以濟親族鄰友之貧及爲一切慈善事道光十八年米
價騰踊貴隆存米六百石盡數發給貧民不取一錢邑
令劉文蔚題好義堪嘉扁旌之貴隆常言遺子孫以德
不以財遠近呼之爲張善人

戴錫川武舉狀貌魁偉初應小試縣宰奇其狀拔冠童
軍錫川爲人剛直好義言事無所迴避歲飢民乏食錫
川自捐米石在永安場玄天觀設廠施粥躬親執爨屢

月不倦人以爲難子廷弼武科解元捷進士鹽廠營守備

趙連城

弟崇仁 孫迪光

陳綱

子宗典

孫登俊

趙連城字蘊堂全集鄉人幼曠學年十四始勵志讀書補諸生食餼貢成均生平友愛兄弟相勉以學性嚴正屈升之王再咸皆敬憚之尤好任恤歲歉時出米減值零售里中之貧者里人曰不患米貴只患趙家無米其惠及人若此卒年八十三弟崇仁子應魁早卒孫迪光獻光均諸生

溫江縣志

卷八

人物

五

川七

崇仁字靜山少讀書有進取志五經傳注皆能默誦屢試不得志於有司遂絕意仕進娛情林野與諸兄友愛怡怡居鄉不臧否是非和氣可掬凶暴爲之默化好周恤里黨貧乏年歉有賑歲終有給以爲常佃戶納租往往減讓鄉人感其德一夕盜劫其家鄰眾鳴鉦集團爭奮往救追逐羣盜至天明始散其得人心若此仲子緗別有傳孫熙光領鄉薦官浙江知縣璧光試用訓導陝西通判民國長甯知事

迪光字吉生喜爲慈善事嘗言小市乏米價必騰貴每

於米貴之年籌設局減價賣米以所得串底錢作局費
貧民便之著有救荒芻言一卷其他設粥廠修監卡純
用雄黃石灰築地基以驅除溼利人及物之事尤多子
建中歲貢生民國四川靖國軍遊擊司令部書記官孫
正達議敘府經歷民國注冊分知事

陳綱字紀立性慈善好施予晚年好靜修垂歿之日凡
親友借貸貧不能償者悉還其券數計千金子宗文宗
典均克家宗典尤善承其志常繞膝承歡深夜忘寢至
地方公益知無不爲孫登魁登科並入武庠登俊咸豐
溫江縣志

卷八

人物

五

川八上

己未恩科武舉

登俊字灼三少負氣節精習武藝以武舉充兵部差官
候補漕河守備以性情剛方不諧世退居田里屢經縣
令禮請襄辦團務先後十餘年地方賴以安謐見時局
日非乃屏棄世事日以栽花種竹吹簫弄笛自娛嘗語
其孫希烈曰方今之世但求淡飯粗衣足矣安用進取
爲哉卒年七十二

袁景堂

子嵩齡

兄子吉

陳天柱

弟天恩

天

袁景堂字璞山天性孝友家素裕以宿望總理鹺務入

資候選直隸州知州既從劉沅學遂無意仕進生平善舉費以萬計邑令劉文蔚雅重之嘗微服過其家坐頃適有橫逆在門肆詈聲達戶內令驚問景堂飾他故解之其人深感不復至尤喜讀書家藏數千卷以教子孫卒年九十六子嵩齡

嵩齡字魯珍生平讀書曉大義補諸生邑令章燮議培修學宮艱於籌款嵩齡慨然捐銀一千兩一時士紳感激遂集萬餘金殿廡堂門頓改舊觀規模闕偉煥然一新藍逆之亂嵩齡糾率鄉人士請官籌防守事宜紛議

溫江縣志

卷八

人物

五

不一嵩齡慷慨言曰未辦城防先籌經費予雖力薄願捐錢六百貫繼之者爲張星雲及典商亦各捐錢六百貫以下量力俛助頃集資二萬餘於是購置礮械經營城防嵩齡與陳天恩董其事城賴以保應得議敘悉歸弟晉賢後官宜賓訓導子承典別有傳景堂兄子吉

吉字靄如道光丁酉拔貢朝考報罷南遊至浙甯波提督余步雲一見器許以女妻之適英人犯境城兵他調城陷步雲罹法吉親爲撫尸棺殮護喪及其眷歸蜀授大竹教諭文章品行深得士心會縣試令激變試童試

童咸聲言非袁學師主試必罷考令不得已延吉入場始獲竣事歸主講萬春書院適藍逆之亂邑令潘銘鑒以其三公子陣亡決意告退吉走謁成都府請委員督辦軍務邑賴以安吉兄子承光

承光字謙甫廩貢生以護城功保教職歷署資州理番學正持身以正爲士林先生平介直居鄉多抑強扶弱濟困扶危之事卒之前數日妻劉夢二阜隸入室跪稟迎承光赴任越數日承光病終年六十四

陳天柱字安亭業鹺務爲人慷慨樂施凡涉地方公益

溫江縣志

卷八

人物

五七

揮金不吝鄉人義之道光十八年戊戌米價騰貴饑民匈匈縣令劉文蔚集紳籌賑各紳輸捐無幾令怒然憂之適天柱因事入署具言籌款之艱天柱退約同好會恆順共捐銀三千兩立往下遊買米運糶人心遂安里中凡遇裁困輒捐貲賑給邑令書好義堪嘉扁旌其廬弟天恩

天恩字福山好義如其兄藍逆之亂縣令委辦城防時督辦軍務委員程祥棟調各甲團首不卽至軍情火急呼應不靈祥棟憂之乃設四總保爲各團領袖以天恩

爲城廂總保天恩左右祥棟竭力經營城得屹然無患
事平議敘州同銜賞帶藍翎同治三年甲子米價騰漲
貧民乏食縣令委辦賑務天恩竭誠勸捐集米千餘石
以濟南京及本省軍捐皆由天恩擔任勸集銀一萬餘
兩鄉人爭衅得天恩一言遂爲排解人咸服其公正子
德隆字楓皋庠生嘗以談笑爲人排難任事有肝膽知
者以爲鄉閭不可少之人

劉昌鏞

楊光裕

王再韶

駱化鵬

彭元章

沈萬祥

溫江縣志

卷八

人物

五

川

劉昌鏞字友笙性孝友篤於宗親置烝嘗田四百畝以
祠祀之餘周恤親故爲諸善舉不可悉數以是爲鄉里
所慕咸豐末羣盜蠡起江南軍亦犯蜀總督駱秉章檄
昌鏞辦理通省城防團練昌鏞日夜竭蹙風雨勤勞經
畫周悉境內賴以輯安及寇平以功荐至藍翎同知時
征權繁興本省籌餉捐江西餉捐貴州餉捐及本省津
貼捐輸皆始於此昌鏞奉制府委襄其事時出入餉項
百萬之鉅握財柄者爲某大吏所信用昌鏞察其弊竇
百端謂他日破露誰職其咎遂拂衣而去知成都府楊

重雅詢其故昌鏞以弊白重雅重雅稟大府委員查辦數月不得其要領重雅迭函召昌鏞均辭以疾重雅造門敦勸昌鏞始與在事二三正紳會同委員將各省各項餉捐名目一一標識秉公核算明晰弊端查出呈明大府駱公韙之稱爲理財大家昌鏞名益重後迭奉檄監修貢院考棚事皆核實同治三年甲子歲飢委辦省城四門平糶飢民注籍者皆無冒漏十二年癸酉總督吳棠又委創辦四門粥廠皆悉心籌措惠利咸敷制府吳公旌其門曰爲善最樂晚歲家居課子孫讀書尤隆

溫江縣志

卷八

人物

五九

川上川

重師道而仁厚恭敬之心歷數十年如一日垂老猶囑子肇藻修通佑王廟捐六百餘金卒年六十七子十人肇瀛庠生肇源國子監典簿肇梁翰林院孔目肇藻花翎四品銜陝西知縣肇沐日本東亞鐵道學校畢業巫溪縣知事肇洵京師法政大學畢業吉林審判廳推事孫十二人樸基四川鐵道學堂畢業楷基四川商業專門學校畢業

楊光裕字特峯少失怙恃從陳天柱業鹺商長師劉沅爲善益力道光末邑令章燮改建學宮光裕倡首捐銀

五百兩爲經紀其事後居省自奉甚薄而最急公義爲成都守楊重雅所知凡有大工役必倚任之咸豐末年李永和藍朝鼎之亂省城戒嚴大府檄光裕辦城防日夜勤劬雖子病不歸練勇索餉譁噪光裕出慷慨曉以大義眾皆帖然事平以功保藍翎鹽提舉銜經修貢院考棚工堅且整士林利之生平好濟人急致家窘常以不徧及困窮爲歉年七十一時同人醵金爲光裕壽光裕用所遺金製棉衣百什襲還送諸相壽者俟隆冬救寒赤曰吾以廣君惠也按察司黃雲鵠爲之序光裕與

溫江縣志

卷八

人物

李

川上

人和而不同喜導人爲善苦口誠心智愚化之年八十三無病而終子蔭霄蔭鍾均廩生

王再韶字賡唐性沉毅以商致富生平多善舉族黨中婚喪有不舉者悉資之其餘待以舉火者尤眾捐貲創建宗祠又寄金回原籍湖廣武岡重修譜牒以敦睦宗支滇匪之亂助當事守南城捐助巨礮戒備卻賊歲歉倡辦平糶全活尤夥其他賑濟水患火災施藥棺衣米之類數在巨萬以上子展節庠生候選主事加花翎四品銜再韶以是封奉直大夫晉中憲大夫

曾學傳曰雙流舉人劉成煖爲封翁作傳後述王君
凌齋字展節欲爲其尊人闡發潛德幽光浼愚作傳
因不揣固陋勉濡毫以應命云云余以劉君君子也
爰節其大者著之

駱化鵬字雲程武生性敦厚族中子姪有貧者五六人
悉招聚於家延師課讀爲籌數年束脩成材後令各歸
自立門戶閭里重之藍逆之亂里中公推主辦團務化
鵬任之團費不肯重籌有委員查驗令加籌團費多購
軍械以壯聲威化鵬卒不肯以此累民軍械取敷用而
溫江縣志

卷八

人物

空

川上八

止至今父老猶有稱之者子榮別有傳

彭元章爲人剛正好善藍逆之亂元章首捐貲練團以
衛桑梓眾推元章爲心一團團首藍逆竄永安場元章
率團丁截殺尾賊數十人後賊敗丹稜後由雙竄溫元
章糾合團眾坊堵賊從昇平場北遁自是境內無賊蹤
元章初苦貧力勤本業積買田二百畝與弟均分有族
弟姪俱幼失怙恃元章養之成人爲納室各予銀三百
兩以自立姊妹四人夫家皆貧胥給銀二百兩助之族
戚中鰥寡孤獨待元章舉火死爲殮葬者數十人鄰里

之貧者婚喪皆時爲依助而家亦自是窘矣元章宴然處之不少衰年近八十猶督其子捐募修達津橋觀其成而後已生平持躬嚴正里人有不善皆畏元章知之無爭訟者其表正一鄉若此

沈萬祥字瑞亭父孔昭儒生萬祥受庭訓識義理以家貧改業經離務牛華谿違家數百里歲必數歸省親父母歿後兄萬禎與萬祥析居後萬禎家甚窘萬祥復與同居合爨姪文彬早卒姪婦蕭氏孀居歷年萬祥爲立嗣分業姊適張氏家貧時賴萬祥資助親友告貸必應溫江縣志

卷八

人物

三

不能償輒焚其券卒年七十八長子士珍庠生季子文焯能世其德

陳光字 王 瑞 何濟清 曹 澍 蔡恆修

李廣元 陳登第 唐燮元

陳光字字百齡歲貢生候選訓導生平學邵品粹表正鄉閭年老人一望知爲德器某歲三月三日天氣清明光字忽曰吾將逝矣遂沐浴更衣端坐而卒

王瑞字蘭圃歲貢生家貧性廉介舉止端嚴設帳鹽井莊門下多所造就嘗倡立惜字會釀錢二十緡隻手經

理孳息置田一百四十餘畝爲地方公益藍逆之亂練團保衛桑梓賊至寡不敵眾賊焚其廬以此家益窘敦行不倦卒年七十九鄉人士歲時祀之於鹽井莊門人黃煒字懋齋諸生能紹其學行

何濟清字鑑亭廩生授徒喜培植寒畯門下多知名士徐從樞少時家赤貧濟清愛其才教養兼施得成進士張鵬萬王再咸皆出其門而濟清以窮老終士林爲之太息

曹澍字雨生性剛方寡言笑授徒學規綦嚴凡飲食起

溫江縣志

卷八

人物

奎

川X十一

居必準諸禮詞章記誦因材教之年六十始得子香亭猶親見其入泮始歿

蔡恆修字亨衢增生舌耕爲業崇信因果以覺世經陰騭文遏慾文等書爲入善之路因著覺世經七律一百二十四首陰騭文五律七十四首遏慾文七絕三十六首自行刊布廣爲勸導鄉人多稱誦之卒年八十四李廣元字樸庵家小康凡親友之貧薄者借貸無弗允自身遭遇坎坷不較惟以德行課徒壯年喪偶不再娶晚歲常思己過凡負人財物悉償之若死則以其貲市

楮焚於墓卒年八十一

陳登第副貢生生平不干外事惟喜讀書臨歿自爲輓聯云一生拙於謀利二世還是讀書

唐燮元字萼樓邑人入華陽學籍光緒己卯副貢時士習卑靡趨勢燮元立身剛直不畏彊禦士氣爲之一振官闈中教諭歸有一官身外物得失何妨語此可概見其生平卒年七十六

李錫璋 楊進道 宋孚中 朱紹濂 弟紹烈

史載銘 戴伊川 李光价

溫江縣志

卷八

人物

六

川文

李錫璋字方南雲樵老人孫舉人官長甯訓導幼失恃事繼母如生母與兩弟皓首相親主講萬春書院或因訟事以八百金干錫璋介說於官錫璋怒斥之干者愧汗而去其守正若此

楊進道字漸庵其先新繁人幼失怙母溫江王氏女因卜居邑北太平鄉遂爲邑人進道念母寡居常束身勵學以慰母志補諸生貢成均生平不干外事課徒養親雖寒素甘旨未嘗缺母有命雖不欲必曲從以博其歡夜間侍母幃笑語溫溫必俟母安枕然後退進道無兄

弟待從弟某若同胞飲食教誨不倦母黨無親疏時借貸累多金不求償母年八十五臨終謂進道曰汝惇行若此吾雖苦節逝瞑目矣進道晚不廢學自少所磨石硯皆穿壽如其母

宋孚中字杏生早年能詩賦入邑庠補增生咸豐末滇匪犯境辦城防團練以功保訓導亂平仍自安寒素友教四方晚歲益務靜修學官杜翰藩好詩每引邑人士之能詩者相唱和爲樂一日中孚以老諸生入座眾皆易之而中孚吐詞俄然驚坐然不以自多也中孚處事溫江縣志

卷八

人物

七

三十三

有光其苦樂皆有非人所能知者卒年八十六朱紹濂字小溪恩貢生早受學於李錫珍卽以敦品飭行爲本趙三麒爲紹濂父之師紹濂尤信仰謂起漢季管寧諸公晤對一堂頡頏進退未知誰爲伯仲紹濂夙所濡染皆先輩之懿行故其文學踐履皆不詭於繩墨之外蓋一鄉之端士也弟紹烈

紹烈字子端諸生早歲與兄砥切兄歿後寡交遊民國興學爲南區勸學員某學究以金壽之求正覺寺小學

校教員一席紹烈叱之不受學究懷慚而去其耿介猶有古風

史載銘字介如以醫名家有薄田多種藥苗常懸藥籠於庭凡鄉里貧病者來診視卽裹藥與之應手卽效報以財物輒卻之雖奇疾未嘗受謝性好讀書閒暇爲詩歌以自適著有醫案及詩草藏於家卒年七十六子中立孫致祥皆賢孝能世其德

戴伊川字宅安性至孝工書法厯事三母皆以孝聞少應童子試學使以字冠通場取入學後遊京師求書者

溫江縣志

卷八

人物

三

川上

不絕卒以不遇而歸在家以尙書春秋左傳教子姪嘗云讀書當窺大體不可守章句生平端直才學兼資多利濟地方之舉頗爲鄉人所倚重

李光价字仲藩少聰穎嗜學年十九補諸生成都府師範學校畢業爲小學校教習以善教稱光价爲學崇刻苦國變時曾學傳里居爲教育研究會光价與焉乞學傳爲作刻苦箴懸座右自警嗣爲明倫小學校校長改爲模範學校慘澹經營備盡心力年三十一嘔血而終士林惜之著有兵餘日記藏於家

楊子維 子金芝

李如相

趙星奎 子玉瑞

周

宗伸 陳琳五

衛朝先

周明輝

王體綱

楊子維少貧勤儉致富置田五百畝好施濟歲入租不市售惟零賣與鄉人所得錢藏一室以備鄉人有故借貸子維納券匣中償否悉聽子金芝桂芝能繼其德歲荒於村中設市賑飢鄉人以安桂芝尤廣施子將歿積券十匣親督子孫於庭焚之其後嗣繁衍食餼在庠者十餘人皆率祖教無違

李如相性好善路遇一婦人攜一幼女背負一孩啼泣

溫江縣志

卷八

人物

七

川

欲投江如相即問其故婦曰吾夫被冤錮獄中家赤貧無以救母子亦無計度日惟求一死耳如相急慰之以婦母子口食及營救其夫出獄為己任後悉如其言時如相年已五十餘無子明年舉一子人咸以為作善之報云

趙星奎少壯為人跌宕不事檢押後悟其非遂折節為善家貧衣食於奔走自奉極嗇或日一餐所餘貲輒於夏秋間買棉衣絮襖呼家人澣濯補綴值隆冬嚴寒以給道路之凍者歲數十領或百餘領以為常行之數十

年不倦沒齒而後已子玉瑞

玉瑞爲人質直初營小貿赤手成家兼務農業督子鍾靈讀書鍾靈以舉人仕湖南知縣玉瑞年已老猶徒步赴鄉場執舊業不少改其生平布衣芒屨與田夫野老相處人皆忘其爲封翁也鍾靈病卒於湖南玉瑞精神猶矍鑠又數年始傳家於孫汝翼頤養春秋卒年八十九鍾靈文學有傳汝翼曾任武勝縣實業所所長

周宗伸字笏端生平好施予同治甲子歲荒貧民乏食宗伸家儲米數十石傾倉出發不取一錢鄉人感頌書溫江縣志

卷八

人物

六

爲善最樂扁贈之
陳琳五庠生同治癸亥大水釘耙堰上中下三溝堤并潰眾苦修款巨琳五仗義獨修費工五百餘金三月功成人食其利

衛朝先性悃悞家雖中產樂善不倦清平橋屢圯朝先捐二百金購石相水勢移下流一百五十步造橋今四十餘年人賴其利

周明輝好善樂施姨母徐羅氏貧無依明輝延而養之至死爲殮葬歲飢米價翔貴出所儲米減價以贍里中

貧乏鄉人德之

王體綱高祖文煥孝友有傳體綱性慈愛好施濟年六十餘病卒三日復甦爲善益力又數年無疾而逝

熊世傑

趙國泰
易海珊

李述璜

何伏雲

伍光謙

張明芳

熊世傑幼失怙受母馬氏教育家寒棄讀爲商漸致饒裕山西太原客商秦鴻泰就世傑質貨未成遺一囊內貯銀四百兩世傑命徒守待次晨鴻泰覓問世傑以原物還之鴻泰泣曰此誠活我之父母也世傑生平事母

溫江縣志

卷八

人物

完

四一八

至孝尤樂善不倦光緒二十八年大疫施棺百餘具捐義塚十餘畝於三聖寺側歲施藥千劑棺四十具年終米十石棉衣百襲以爲常其愍恤親鄰賑贍孤寡不可勝計適縣中興學世傑與楊大章宋長松籌辦學款任油麻菸捐局事時創始爲艱世傑與大章長松苦心經營學款賴以成立

趙國泰字吉亨好施予吳場興學國泰歲以其碾租半入校充費

易海珊值清末興學捐助學款二百餘金

李述璜字渭濱性仁孝每見異味食不辭翔值必購以遺父母李村堰崩決功浩眾難之述璜捐貲督修匝月觀成今蒙其利

何伏雲性孝友兄弟叔姪同居數十年門庭雍睦人無閒言尤樂善好施民國五年秋楊柳江暴漲德新橋堤岸沖刷居民數十家皆沒於水伏雲出貲救濟水平後約修橋堤首捐錢四百千并任監修事其他施藥發米諸周恤之事歲以爲常卒之日鄰人無不流涕

伍光謙字選廷富才識以商致饒弟光麒析產多年光溫江縣志

卷八

人物

七

三

謙以自置田四十畝分之又創清明會置祀田每歲焚獻有資光緒二十六年雙鳳橋圯光謙捐資獨建張明芳家屬中資民國六年清遠橋兩岸頃刷十餘丈明芳募修費不濟捐金二百餘以葺其事

戚廷英 官聯陞 羅雲錦 胡中美 彭信古

弟好古

戚廷英字俊之有幹才爲城廂總保時聞有因路斃浮屍破家者廷英稟縣請抽猪釐設三費局民間遇有路斃浮屍稟官勘驗由局掩埋自是民患遂除又請設棲

流所使流丐無暴露之慘置南北郭義塚使窮民死者有葬地藍逆犯境奉札招募民兵餉糈無出廷英向商號撥借米千餘石軍需立就事平卽請抽菸蔴捐償之荐保巡檢未出仕卒於家年七十餘

官聯陞字級三性鯁直不阿鄉人有爭執片言立解凡地方利益事無不力任其難嘗濬鵞頂頸修築黃土堰灌溉田畝人享其利里中廟宇橋梁興壞振廢事無不舉更與其孫秉政創設文殊寺飛龍寺兩學校均極盡心力卒年八十二誥封武德騎尉子青雲城守營千總

溫江縣志

卷八

人物

七

文民國初嘗官憲兵營營長

羅雲錦字瑞生兄早卒雲錦撫孤若己出友愛弱弟人無間言藍逆之亂土匪乘勢猖獗雲錦練鄉團保衛桑梓人賴以安自是遂爲鄉人所倚重雲錦爲人沉毅果敢廉正人不敢干以私先後經理團務幾四十年鄉人陰受其福總督丁寶楨奏獎從九旌其門曰急公好義卒年八十五

胡中美字尊五性樸直家本中人資而好慈善事邑令張鐸任之爲三甲總保保內有訟事差婪索不得令益

賢之從公四十餘年常勸人息事息訟宅心公平人被其德稱之爲胡大菩薩卒年六十餘無子人比之鄧伯道云

彭信古字仿安咸豐庚申滇匪寇境信古領鄉團守禦有力歷保候選知縣加同知銜然不願仕築怡園自樂終其身時縣令威權重出入令署者亦能作威福畏鄉人官之下鄉人重視者惟總保令聽治惟總保言是察信古任城廂總保歷年編戶悉賴之以安無以信古言取罪者曾學傳里居諸勢要人咸短之惟信古曰善信

溫江縣志

卷八

人物

七

古生平與人無城府言笑藹如年逾七十精神奕奕不衰其卒也曾學傳表其墓稱之爲善人年七十五弟好古子祖立陝西縣丞祖越樂善能繼振家業

好古字敏齋少時母患目疾療治不愈好古茹素祈禱左右服事維謹長處家庭敦崇仁讓常惴惴惟恐天性之傷教子專務讀書明理常以親君子遠小人爲誠家法秩然卒年五十四好古子祖澤廩生祖濬試用訓導日本弘文師範學校畢業歸國爲京師蜀學堂監學旋里任縣高小學校校長祖洸附生祖賢著有娛園詩草

一卷

袁德森 周文新 唐賢俊 鄭國治 由榮宗

李文雙

袁德森字茂亭生平好善樂施尊師重道課子孫以詩書卒年八十八子淳道光乙未恩科舉人溥字博山澍字香穀均庠生皆授徒五十餘年生徒數百人淙字小泉庠生早世溥子善樞善培善增澍子善勳善宸淙子善寬皆入邑庠克世先業

周文新性直心慈好急人難妻鄧生子鳳岐鄧卒續娶溫江縣志 卷八 人物 七三 王性慈孝內助調恤尤多連生七子鳳岐庠生以練團禦匪功署梓潼蓬州訓導次鳳揚武生樂捐施建達津橋功尤著四鳳翔阜和營都司餘或讀或耕均克體父志爲一鄉物望人美之爲周八士云

唐賢俊字人傑性磊落好施予親鄰故舊匱乏告貸罔不應雖千金不吝生平施醫藥棺木無算凡利人濟物事爲之必力家以此漸窘而不改其度常以忠恕二字勸子孫名其堂曰忠恕堂卒年八十三子允中增貢生歷任瀘州資州教諭孫棣華庠生

鄭國治字修齋爲人嚴正居家有法雖細物必飭老幼男女數十人無鬪牌吸煙嬉遊者自奉甚約而恆周人之急族中有不能自存者必爲之所生平與人無忤晚歲所居自署聯云閒時檢點生平事靜坐思量日所爲其修省若此年八十二無疾而終

由榮宗字耀先歷世以忠厚傳家榮宗持之終身初以家貧廢讀學色染壯歲始自營業省垣課子讀書尊重師友試期聯牀促席款洽數十日不厭館寒士至二三載待遇如賓償父債千餘金葬兄弟戚族二十喪家以

溫江縣志

卷八

人物

七

七

此無積累生平經歷艱苦惟務忍耐喫虧不傷忠厚晚歲子樹蘭成立榮宗遂不復問家事優游終老臨歿自言吾赴某縣城隍任去矣年八十樹蘭增生四川高等學校文科畢業中小學檢定委員川西區省視學

李文雙字星橋性至孝嘗傭工養親人比之江革後經商成都教子讀書極隆師道子天楨舉於鄉官廣西知縣以祿養文雙布衣蔬食終身不改其素生平寡言笑治家嚴肅門內秩然卒年七十六天楨字士周國變後歸里寓省城不仕

張萬鍾 蕭肇修 王有寬 蘇相元 雷申健

劉志春 劉松廷 余海山

張萬鍾性至孝業耕讀年二十三妻王氏病歿遺子志俸萬鍾念妻孝事翁姑義不再聚孫國賓庠生爲請旌入祠

蕭肇修字紀堂增生性孝友里居授徒不干外務妻歿僅遺一子肇修守義終身不再娶

王有寬字海樓趙東垣弟子年二十四妻陳氏病歿有寬念妻已生二子永不重婚年五十八無疾而終

溫江縣志

卷八

人物

七

蘇相元字勸生早歲務農商事父母能得其歡心弟妹婚嫁拮据均一力任之性剛直族黨敬憚課子讀書尤隆重師道待兩弟推逸任勞分產取少外舅姑成都曾氏無後爲之檢葬撫嗣二十餘年乃成晚歲尤好靜能預知休咎年七十五無疾而終

雷申健爲人醇厚有古風鄉里稱善人母族李氏貧且乏嗣申健爲擇其族子立後贈田四畝供朝夕倡建宗祠以睦親族嘗書孝弟忠信禮義廉恥八字於牆壁藉以警子弟生平好易著有易經離句藏於家子天祚習

桑學天宗省立第一中學校畢業生

劉志春字星亭陝西三原人來溫執業商號藍逆之亂
夥友悉逃志春守職不去事平號東以此重之志春乃
家於溫聚室生二子秦人嗜利多以商業傳家志春惟
以詩書課其子長藜輝次藜芳皆補學官弟子員志春
歿後二子守家訓常念父母之善不忘志春庭教蓋可
想見云

劉松廷本市井人天性純篤樂善不倦辛亥之變其弟
商牛華谿干戈路塞松廷恐其遇害朝夕悲泣不已及

溫江縣志

卷八

人物

三

弟歸始慰生平敬老恤貧救人之難不可殫述創辦樂
善公所繼之者方興未艾松廷歿後鄉人稱善不衰其
利之溥蓋未可量云

余海山性誠樸爲杜氏傭四十九年少主國賓遊浙病
癩主母遣海山往覓海山跋涉數千里至浙見少主病
甚海山左右保持夜不解衣將少主西歸途中海山病
復勉強行程抵家國賓病瘳杜氏深德之

黃鳳山 李士清 張安國 劉大川 周國昌

周縉臣 吳志良

黃鳳山原名志剛字卓生藍逆之亂鳳山辦武衛團練團丁五百名衛桑梓有梁天尺凌鬪很等謀亂應藍逆鳳山破獲送官正法地方以靖後藍賊竄至龍家灣鳳山復率團丁從官軍血戰一晝夜賊敗走安德舖唐有庚稱其敢作敢爲薦於總督駱秉章駱公召之不肯往遂老田間年既耄精神矍鑠雖冬不裘常早起單衣行嚴霜中胸背挺直如壯士可謂奇傑矣卒年九十三孫宗幹見實業所所長

李士清字蘭廷性豪爽好施濟老年猶壯辛亥之變土

溫江縣志

卷八

人物

七

匪蜂起士清聯合八保招集數百人保衛地方土匪不敢近事平獎授中尉士清出家財給團丁散歸農卒之日鄉鄰皆哭之年八十三會葬者千數百人

張安國字定之年三十妻宋亡遺四子皆武舉安國終身不再娶親族勸之安國曰娶妻爲後吾既有子女何必續絃安國性剛直無私爲人排難解紛斷曲直無不悅服見年九十鬚眉皓白精神矍鑠黃冠草履來往鄉鎮間見者咸異之

劉大川生平慷慨好義見年九十餘猶一日步行八十

里

周國昌爲人和平正直見年九十餘康健如少壯

周縉臣爲人忠厚見年八十八與妻偕老

吳志良字知庭事親孝年三十妻亡遺子女各一志良義不再娶鄉鄰爭訟必爲和解持身教家接物總以孝弟忠信禮讓爲本見年八十餘猶精神矍鑠孫曾林立四世一堂人以爲盛德之報

曾洪錫

子運開

曾洪錫字瑞三宗聖七十二世支孫也曾祖璠自廣東

溫江縣志

卷八

人物

七六

川川

長樂遷華陽夫婦皆年近期頤四世同居璠妻卒時子清賢年已七十四蒼顏白髮能盡哀禮鄉人稱之清賢六子長盛桂洪錫父也居家以禮男女六十餘口閨門內外肅然盛桂歿後家以齒繁累重負始析爨洪錫獨身任債務償負之餘惟書硯一囊且復喪室乃攜二子來溫僦居課徒遂家焉旋娶副室迎母鍾於弟家在親前雖極困窶未嘗見諸辭色惟談樂事以博親歡母歿衾棺皆貫盡哀而止弟洪鈞任某鹺商分肆虧折爲經營以償友愛終身後因子商家小裕族屬遠近歲時存

省患難必恤婚喪必助見所知窮乏耻於色必爲之所而後安歲飢每當食而歎必罄所儲速糶而後慰生平喜讀書時爲謳吟輒有俯仰自得之趣初舉孫學傳曰吾學有繼矣少長牀前授書卽教以聖賢可學而至坐立小有不正卽訓戒之諸孫就外傳終歲禮饋師門絡繹不絕臨終囑子運開猶惓惓以讀書啟後爲居家大務卒年七十有一

運開字光宇幼入塾卽好苦記勤思不少懈少長丁家難飢寒輾轉無不周歷後以經商家少裕每夜歸必就

溫江縣志

卷八

人物

七

父榻前坐話踰時家人環集笑語温温以爲常洪錫自題房聯曰寬閒樂敘天倫事瀟灑歡吟性分詩皆運開之能養志有以致之也父歿感傷致疾羸瘦如柴喪事竣後注督子詩書以繼先志多購經史百家及儒先經世講學書課其子時以遠大相期而深以學無眞得闢茸酸腐爲戒家之有無遂不復計子學傳弱冠喜功名事兵學慨然以伊呂自負運開以學無基址夸大無成力戒之轉從事於義理之學而後已運開爲人嚴毅諸子皆敬憚之不敢懈其業卒年五十四子學傳廩貢生

四川高等學校教員民國四川國學院院員見四川高等師範學校教員著有阜江全書九十五卷學仁光緒壬寅舉人盛京長興烏州判民國川西宣慰副使見四川省議會議員文藁散佚存鐵垣詩草二卷孫寶和受家學見省立中學校國文教員年二十四著有磐齋初集六卷

曾學傳曰吾家歷世仄微無顯者窮檐篝火中脈脈相授者其惟武城之澤乎南豐文章湘鄉功名亦未焉爾烏虜天荒地老人事日變眇眇之身生逢斯世

溫江縣志

卷八

人物

八

一

何爲也哉何爲也哉

溫江縣志卷八終